

Sogʻlom avlod – sogʻlom kelajak Salomatlik

Davlatimiz rahbari Islom Karimovning shu yil 18 iyunda qabul qilingan “Bolalikdan nogironlar tugʻilishining oldini olish uchun tugʻma va irsiy kasalliklarni barvaqt aniqlash Davlat dasturi toʻgʻrisida”gi qarorida onalar va bolalar salomatligini muhofaza qilish, sogʻlom avlod tugʻilishi va tarbiyalanishi uchun zarur shart-sharoitlar yaratish, homilador ayollar va chaqaloqlar patologiyasini barvaqt aniqlash borasida muhim vazifalar belgilangan. Mamlakatimizda tibbiyot sohasida amalga oshirilayotgan izchil islohotlar sogʻlom avlodni voyaga yetkazishdek olijanob maqsadga xizmat qilmoqda. Millat genofondini saqlash, nogironlik va nogiron farzandlar dunyoga kelishining oldini olish eng ustuvor vazifalardan biridir.

Joylarda homilador ayollar va chaqaloqlarni tibbiy koʻrikdan oʻtkazish orqali irsiy kasalliklarni mumkin qadar erta aniqlovchi skrining markazlari tashkil etildi. Onalar va bolalarni, shuningdek, nikohlanuvchi yoshlarni tibbiy koʻrikdan oʻtkazish borasidagi ishlar ham oʻz samarasini bermoqda. Prezidentimizning Vazirlar Mahkamasining shu yil 8 fevraldagi majlisida soʻzlagan maʼruzasida taʼkidlanganidek, keyingi oʻn yil ichida onalar va bolalar oʻlimi sezilarli darajada kamaydi. Goʻdaklar oʻlimi koʻrsatkichi 2006 yilda 11 foizga pasaygani tibbiy xizmat koʻrsatish sifatining tobora yaxshilanib borayotganini koʻrsatadi.

Bu jahhada qoʻlga kiritilayotgan muvaffaqiyatlarda tibbiyot muassasalari jahon andozalariga mos jihozlanayotgani, tibbiyot xodimlarini tayyorlash va qayta tayyorlash ishlari takomillashayotgani ham muhim oʻrin tutmoqda.

Qarshi shahrida 1998 yildan buyon faoliyat koʻrsatib kelayotgan «Ona va bola» skrining markazi soʻnggi besh yilda eng zamonaviy tibbiy uskunalar bilan boyitildi. Sogʻliqni saqlash vazirligi, «Sogʻlom avlod uchun» xalqaro xayriya jamgʻarmasi tomonidan qon tarkibini chuqur tahlil qiladigan va ultratovush diagnostikasi apparatlari oʻrnatildi. Markazda hozirgi vaqtda perinatal va neonatal skrining tekshiruvlari boʻyicha 12 mutaxassis-vrach ish olib bormoqda. Oʻtgan davr mobaynida markazda onalar va bolalardagi nasldan-naslga yashirin oʻtadigan irsiy kasalliklar, qalqonsimon bez kasalliklarini aniqlash va oldini olish boʻyicha katta tajriba toʻplandi.

– Markazimizda genetik laboratoriya, kunduzgi maslahat boʻlimi ishlab turibdi, – deydi “Ona va bola” skrining markazi bosh vrachi Ziyoda Avloqulova. – Shu yilning oʻtgan davrida 24 ming 800 chaqaloq neonatal skrining qilinib, kasallik aniqlangan bolalar dispanser nazoratiga olindi. 3 ming 700 dan ziyod homilador ayol ultratovush va biokimyoviy tekshiruvlardan oʻtkazildi, ayrimlariga zarur tibbiy yordam koʻrsatildi. Markazimiz mutaxassislari davolash-profilaktika ishlari bilan birga, aholi oʻrtasida, qishloq vrachlik punktlari, taʼlim muassasalari va mahallalarda bolalar nogironligining oldini olish, ayollar reproduktiv salomatligini yaxshilash va sogʻlom oilani shakllantirishning ahamiyatiga doir tushuntirish ishlarini olib bormoqda.

A.Muhammadiyev